

中國圖書集成

四庫全書

全書總目

中國邊疆史志集成

內蒙古史志
49

全國圖書館文獻
縮微復制中心

欽定熱河志卷八十八

人物二

遼

姚景行 遼史姚景行傳姚景行始名景禧祖漢英本周將應歷初來聘用敵國禮帝怒留之及景行既貴始出籍貫興中縣景行博學重熙五年擢進士乙科爲將作監改燕趙國王教授不數年至翰林學士樞密副使參知政事性敦厚廉直人望歸之道宗即位多被顧問爲北府宰相九年秋告歸道聞重元亂集行旅三百餘騎勤王比至賊已平帝嘉其忠咸雍元年出爲武定軍節度使明年驛召拜南院樞密使上從容問治道引入內殿出御書及太子書示之賜什器車仗帝有意伐宋召景行問曰宋人好生邊事如何對曰自聖宗皇帝以威德懷遠宋修職貢迄今凡六十年若以細故用兵恐違先帝成約上然其言而止致仕不踰月復舊職丁家艱起復兼中書令太

康初鎮遼興以上京多滯獄命爲留守不數月以獄空聞累乞致政許之加守太師卒遣使弔祭追封柳城郡王謚文憲壽隆五年詔爲立祠

寶景庸 遼史寶景庸傳寶景庸中京人中書令振之子聰敏好學清寧中第進士授祕書省校書郎累遷少府少監樞密直學士大安初遷南院樞密副使監修國史知樞密院事賜同德功臣封陳國公有疾表請致仕不從加太子太保授武定軍節度使審決冤滯以獄空聞拜中京留守薨謚曰肅憲子瑜三司副使

大公鼎 遼史大公鼎傳大公鼎渤海人先世籍遼陽率賓縣統和間徙遼東豪右以實中京因家于大定曾祖忠禮賓使父信興中主簿公鼎幼莊愿長而好學咸熙十年登進士第調瀋州觀察判官時遼東雨水傷稼北樞密院大發瀕河丁壯完隄防有司承令峻急公鼎以大興役事非利國便農之道疏請罷役從之水亦不爲災改良

鄉令奏禁鴈坊羅畢之擾省徭役務農桑建孔子廟學部民服化累
遷興國軍節度副使徙長春州錢帛都提點俄拜大理卿多所平反
天祚即位歷長寧軍節度使南京副留守改東京戶部使時盜殺留
守蕭保先公鼎單騎行郡陳以禍福安輯如故拜中京留守乘傳赴
官境內清肅時人心反側公鼎請布恩惠爲肆赦以安之累表乞歸
不許會奴賊張撒八率無賴嘯聚公鼎欲擊而勢有不能嘆曰吾欲
謝事久矣爲世故所牽不幸至此豈命也夫憂憤成疾卒子昌齡左
承制昌嗣洛州刺史昌朝鎮寧軍節度使

馬保忠 契丹國志馬保忠營州人也疏眉目豐下謹重寡慾斤斤
自修人賢其行讀書不謁州縣節用以給親里大饑則賑其餘于鄉
黨太平年間授洗馬改著作郎殿中丞興宗朝爲樞密使尙父守太
師兼政事令封燕國公

金

田灝 金史田灝傳田灝字默之興中人遼天慶八年進士歷官金部員外郎權歸德郎節度使太祖定燕灝舉四州版圖歸朝加都官郎中權節度使事四遷知真定府事招降齊博游貴等賊衆五千餘人三遷行臺左丞彰德軍節度使是時新定力役灝蠲籍之半而上之故相之繇賦比他州獨輕改同僉燕京留守民遮留不得出易服夜去入爲刑部尙書居三月請老卒于家

裕爾伯特

舊作瑤里字迭今改正

金史裕爾伯特傳裕爾伯特北京路庫本明

安

舊作窟白猛安今改正

托囉

舊作陀羅今改正

山穆琨

舊作謀克今改正

人也以軍功歷海

濱令遷徐王府掾以稱職再任御史臺察廉升同知震武軍節度使事明昌初爲唐州刺史尋授西北路招討副使改東北路六年正月北兵圍慶州急伯特率本路軍往救敵解去州竟無患承安元年丞相襄北伐伯特爲先鋒副統後授鎮寧軍節度使以六羣牧人叛改寧昌軍伯特爲都統領步騎萬次懿州敵數萬逆戰勢甚張伯特親

陷陣奮擊却之身中二創捷聞遷一官二年紮軍千餘出沒剽掠錦
懿間伯特追敗之復獲所掠悉還本戶改東北路招討使以捍邊有
功賜詔褒諭三遷爲崇義軍節度使卒遣官致祭賜銀五百兩贈金
紫光祿大夫伯特勇決善戰任兵鎮十餘年所向克捷凡再遷官賜
金幣甚爲上倚注云

鄧儼 金史鄧儼傳鄧儼字子威懿州宜民人也天德三年擢進士
第大定中爲左司員外郎右司郎中尋轉左司掌機務者數年世宗
嘗謂宰臣曰人言鄧儼用心不正朕視儼奏事心識甚明在太府監
心亦向公宰臣因奏儼明事機有心力于是擢戶部侍郎翌日復謂
宰臣曰吏部掌銓當得通練人因改命焉累遷中都路都轉運使
明昌初爲戶部尙書上命尙書省集百官議如何使民棄末務本以
廣儲蓄儼言今風俗競爲侈靡莫若定立制度使貴賤上下衣冠車
馬室宇器用各有等差裁抑婚姻喪葬過度之禮罷去鄉社追逐無

名之費用度有節則蓄積日廣矣尋知歸德府事致仕卒

完顏博恰

舊作伯嘉今改正

金史完顏博恰傳完顏博恰字輔之北京路額

爾袞必喇

舊作必喇今改正

明安人明昌二年進士調中都左警巡判官

豪右屏跡除監察御史劾奏平章政事布色

舊作僕散今改正

揆累官莒州

刺史讞屬縣盜博恰曰饑寒爲盜得錢二千經月不使一錢云何此

必官兵捕他盜不獲誣以準罪耳詰之果然貞祐四年三月博恰奏

西京副統程琢智勇過人以私財募集壯士二萬復取渾源白登有

恢復西山之志盡忠于國百戰不挫臣恐失機會輒擬琢昭勇大將

軍同知西京留守事兼領一路義軍制可兵部尙書簽樞密院事富

察阿爾布色

舊作蒲察阿里不孫今改正

爲右副元帥備禦潼關陝州次沔池土

濠村兵不戰而潰逸去博恰劾之宣宗憂旱博恰奏曰今日之旱聖

主自用宰相諂諛百司失職實此之由高琪汝礪深怨之以御史中

丞行尙書省元帥府于河中控制河東南北路便宜從事奏曰本路

衝要不可闕官凡召辟者每以艱險爲辭乞凡檄召無故不至者宜令降罰悉心幹當者視所歷陞遷詔召不至者決杖一百餘如所請廷議欲棄河東徙其民以實陝西博恰上書諫曰中原之有河東如人之有肩背古人云不得河東不雄萬一失之恐未易取也大忤宰執意罷爲中丞河南大水充宣慰副使按行京東奏曰亳州災最甚合免三十餘萬石三司止奏除十萬石民將重困詔治三司奏災不以實罪博恰純直不能與時低昂嘗曰生爲男子當益國澤民其他不可學也元光元年坐言事過切降遙授同知歸德府事二年三月遙授集慶軍節度使權參知政事行尙書省于河中率陝西精銳與平陽公史詠共復河東頃之有疾薨

富察阿里

舊作蒲察今改正

金史富察阿里傳富察阿里興州路人以廕補

官充護衛十人長武器署令遷右衛副將軍宋兵犯分道鋪馳驛赴邊伺其入以伏兵掩之改提點器物局泰和伐宋從右副元帥匡爲

副統攻宜城縣取之以功遷武衛軍副都指揮使崇慶初遷元帥左都監都城被圍道路梗塞移駐大名軍變遇害

珠嘉

傳作光甲今改正

臣嘉

金史珠嘉臣嘉傳珠嘉臣嘉北京路明安人

襲父穆琨泰和伐宋隸陝西完顏綱麾下歷通州海州同知軍州事貞祐二年除武器署丞救集寧有功遷河南統軍判官興定元年行樞密院于壽州由壽泗渡淮伐宋破宋兵三千于漸湖灘有詔蹂踐宋境上母深入臣嘉駐霍邱楂岡村縱輕騎鈔掠焚毀積聚宋兵屯高柳橋老幼甚衆其寨兩城環之以水臣嘉獲宋謀者張聰遣持牒招之不從先令水軍徑渡攻之軍士牛青操戈刺門卒皆披靡散去遂登陴大軍繼之夷其寨還遇宋兵數千於梅景村臣嘉伏兵林間以步卒誘致之伏發宋兵潰追奔十餘里生擒其將阮世安等五人獲器械甚衆二年賞征南功陞職一等遷元帥右都監轉左都監駐兵京兆元光元年卒

郭俛 金史郭俛傳郭俛字伯有潭州人大定二十二年進士調長子主簿萊州觀察判官萊陽縣令補尙書省令史知管差除大理寺司直太常博士左司都事御史臺舉俛才幹可用詔陞一等除平陽府治中久之召爲同知登聞鼓院兼祕書丞遷禮部郎中滕州刺史同知真定府事上言每季合注巡尉官吏刑兩部斟酌盜賊多寡處選注詔議行之大安元年遷遼東按察轉運使貞祐三年罷按察轉運使改中都路都轉運使泰定軍節度使陝西東路按察轉運使貞祐三年罷按察司仍充本路轉運使行六部尙書改河北西路轉運致仕卒

王維翰 金史王維翰傳王維翰字之翰利州龍山人父庭遼季率縣人保縣東山後以衆降維翰好學不倦中大定二十八年進士調貴德州軍事判官察廉遷永霸令縣豪設事陳訴維翰窮竟其詐杖殺之健訟衰息佐胥持國治河決有勞遷一階改北京轉運戶籍判

官補尙書省令史除同知保靜軍節度使事檢括戶籍一郡稱平屬縣有奴殺主人誣主人弟殺者維翰微行物色得其狀奴遂引服攝侍御史奏事殿中章宗曰佳御史就除侍御史布色揆伐宋維翰行省左右司郎中泰和七年河南旱蝗詔維翰體究田禾分數以聞八年宋人受盟上問復背盟否維翰對曰宋主怠于政事兩淮千里蕭條其臣無敢執咎者不足憂也惟北方當勞聖慮耳權右諫議大夫三司欲稅間架維翰諫不聽轉御史中丞遷工部尙書兼大理卿改刑部尙書拜參知政事貞祐初罷爲定海軍節度使鎮無兵備隣郡皆望風奔潰維翰謂吏民曰孤城不可守此州阻山浮海當有生地無俱爲魚肉也乃縱百姓避難維翰率吏民願從者奔東北山結營堡自守力窮被執不屈死詔贈中奉大夫

鄭子昞 金史鄭子昞傳鄭子昞字景純大定府人父宏遼金源令二子子京子昞楊邱行嘗謂人曰金源二子鳳毛也小者尤特達後

必名世子聃及冠有能賦聲天德二年廷試明日海陵以子聃程文示邱行對曰可入甲乙及拆卷果中第一甲第三人調冀城丞遷贊皇令召爲書畫直長子聃頗以才望自負常慊不得爲第一甲第一人正隆二年會試畢海陵示以第一人程文子聃少之問作賦如何對曰甚易因自矜且謂人莫已若也海陵不悅使與翰林修撰綦戩楊伯仁宣徽判官張汝霖應奉翰林文字李希顏同進士雜試七月癸未御寶昌門臨軒觀試以不貴異物民乃足爲賦題忠臣猶孝子爲詩題憂國如飢渴爲論題上謂讀卷官翟永固曰朕出賦題能言之或能行之未可知也詩論題庶戒臣下丁亥御便殿親覽試卷中第者七十三人子聃果第一海陵奇之有頃進官三階除翰林修撰改侍御史京畿旱詔子聃決囚遂謝兩人以比顏真卿顯宗深器重之以疾求補外爲沂州防禦使皇太子幣賸甚厚命以安輿之官召還改吏部侍郎遷侍講兼修國史上曰修海陵實錄知其詳無如子

時者蓋以史事專責之也卒年五十五子時英俊有直氣其爲文亦然生平所著詩文二千餘篇

中州集小傳鄭子時字景純大定人少日有賦聲時輩莫與爲敵天德三年第三人登科士論以爲屈而海陵不之許也正隆二年詔景純再試擇能賦者八人先以題付之以困景純且將視其中與否罪賞之

御題天錫智勇正萬邦海陵謂侍臣漢高祖諱不避之可乎乃改作萬國

及開卷景純果第一海陵

終不以爲工與被黜者兩罷之趙獻之賀啓云丹桂一枝不失舊物青錢萬選無愧古人其爲名流所稱道如此累官吏部侍郎改侍講學士卒其賦醪醑有玉斧無人解修月珠裙有意欲留仙之句甚爲詩家所稱

謹按子時事史本傳與中州集有三異一第三人登第史係天德二年中州集係三年一史再試時有賦詩論三題中州集祇一賦題又不同一子時中第一人後史有進官三階文中州集

則云與被斥者兩罷之皆不可強合姑兩存之以備考

劉昂 金史劉昂傳劉昂字之昂興州人大定十九年進士曾高而下七世登科昂天資警悟律賦自成一家詩得晚唐體尤工絕句李純甫故人外傳云昂早得仕年三十三爲尙書省掾調西涼路轉運副使術士有言昂官止五品昂不信俄以母憂去職連蹇十年卜居洛陽有終焉之志有薦其才于章宗者泰和初自國子司業擢爲左司郎中會掌書大中與賈鉉漏言除授事爲言者所劾獄辭連昂章宗震怒一時聞人皆譴逐之鉉罷政昂降上京留守判官道卒竟如術者之言

李經 金史李經傳李經字天英錦州人作詩極刻苦喜出奇語不蹈襲前人李純甫見其詩曰真今世太白也由是名大震再舉不第拂衣去南渡後其鄉帥有表至朝廷士大夫識之曰此天英筆也朝議以武功就命倅其州後不知所終

中州集小傳李經作詩極刻苦如欲絕去翰墨蹊逕聞者李趙諸人頗稱道之嘗有詩云雁奴失寒更拍拍秋水天長夢已盡秋思紛難理最爲得意其餘或有不可曉者累舉不第卒

謹按金史地理志錦州舊屬興中後屬大定其地當有與今境相錯者故李經本傳及歸潛志並以爲錦州人

孫德淵 金史孫德淵傳孫德淵字資深興中州人也大定十六年進士調石州軍事判官涑水丞察廉遷沙河令有盜秋桑者主逐捕之盜以叉自刺其足面曰秋桑例不禁採汝何得刺我主懼賂而求免盜不從訴之縣德淵曰若逐捕而傷瘡必在後今在前乃自刺也盜遂引服選尙書省令史不就丁父憂去官民爲刻石祠之累官大理丞兼左拾遺審官院奏德淵剛正幹能可任繁劇遂再任大安初遷盤安軍節度使改河北西路按察轉運使改昭義軍節度使潞州破被執俄有拜于前者皆沙河舊民也密護德淵由是得脫貞祐二

年拜工部尙書攝御史中丞是時山東乏兵食有司請鬻恩例舉人居喪者亦許納錢就試德淵奏此大傷名教事遂寢尋致仕監察御史許古論德淵忠亮明敏可大用士大夫望朝廷起復必能建明以利國家宣宗嘉納未及用而卒

趙子翼 中州集小傳趙子翼字士美大定人正隆二年進士性剛果與物多忤用是仕宦不進以同知臨海軍節度使事致仕居眞定有詩樂府傳于世父仲尹字叔獻三世皆仕至四品職名亦相近士美詩有筆力如賦臨海乳山萬松堂爲可見矣

趙之傑 中州集小傳趙之傑字伯英大定人本名宗傑避諱改大定十六年進士歷西京提刑副使棣州防禦使終于太常卿使宋還言事云宋人文敝之極且脆弱不足爲慮邊部爲可慮也其前識如此子繪名進士早卒孫季卿在燕中

冀禹錫 中州集小傳冀禹錫字京父龍山人崇慶二年進士調沈